

四庫全書

集部

欽定四庫全書

滋溪文稿卷九

元 蘓天爵 撰

碑誌

元故太史院使贈翰林學士齊文懿公神道碑銘  
世祖皇帝既奠天位定百官之儀新一代之制治厯以  
授民時建學以教胄子其謀猷師表之重乃以屬諸中  
書左丞許文正公文正既沒繼者遵守其舊若夫見而

知之卓有學識通制作之本原酌時宜之損益則惟太史齊公其人哉公諱履謙字伯恒甫大名人少從考府君來京師受學家庭讀書一過輒記年十一學推步星歷十三習詞賦府君曰汝欲為進士歟能明經術則聖賢可學公遂研窮性理非洙泗伊洛之書弗好也國家襲金用大明歷歲久弗與天合至元十三年詔立太史局改治新歷尋升局為院公年十七補星歷生同輩多司天世家子忌公才能太史王公恂召問算數皆不能

對獨公隨問隨答王公稱之許文正公楊文康公俱應  
詔治歷公侍左右數請益焉歷成與脩歷經歷議二十  
八年太史郭公守敬奉詔浚惠通河薦公為星歷教授  
奏凡儀象未完者命公完之都城刻漏以木為之其形  
如碑中設曲筒範銅為丸自碑首傳行而下繫統以為  
節既久廢壞晨昏愆度公按圖考訂蓮花寶山漏製俾  
工改為訖今用之遷平秩郎保章正始掌歷官之政大  
德三年八月時加已依歷日食二分六十六秒已而不

食衆懼公曰當食不食在古有之矧時近午陽盛陰微因列唐開元以來日當食不食者以聞六年六月朔時加戌依歷日食五十七秒衆以涉交既淺且復近濁欲不以聞公曰吾所掌者常數也其食與否則係於天及時果食日官爭沒日術不能決公曰氣本十五日間有十六日者餘分之積也故歷法以所積之日命為沒日則沒日不出本氣者為是衆從其議七年八月二十三日夜地大震詔問致災之由弭災之道公按春秋言地

者為陰而主靜妻道臣道子道也三者失其道則地為之弗寧是時成廟寢疾宰執有作威福者故公言及之九年冬初立南郊祀昊天上帝公攝司天故事司天雖掌時刻而無鐘漏往往將旦行事公請自今用鐘漏俾早宴有節則人咸知起敬從之十一年春武宗皇帝自北藩入繼大統太后命卜即位日期公曰帝王即位俱有典禮漢文帝至自代邸以其日日夕即位豈宜拘以禁忌誤大計耶至大二年奉常請修社稷壇及浚太廟

庭中井或以歲君所直欲止其役公曰國家以四海為家歲君寧端在是乎湖廣民家生子數歲身足下有毛行省以為瑞貢之公曰此異類所產不可以見三年陞授時郎秋官正兼領冬官正事仁宗自居潛宮嘉尚儒術及其即位學校貢舉之制興矣臺臣屢薦公當為冑子師宰相李韓公承上意拔用名士擢國子監丞易階奉直大夫公嚴條約以身先之諸生惴惴畏服說經精明質疑請問殆無虛日諸生齋居者休旬無所於食公

積學廩之贏與之夜給膏油繼之公每五鼓入學風雨  
寒暑未嘗懈也改僉太史院事皇慶二年春彗出東井  
公廷奏古者熒惑犯心宋景公反身修德熒惑退舍今  
當修省以弭天變因陳時務八事曰除舊布新進賢去  
邪省刑輕賦節用愛民上改容輕聽明年復拜國子司  
業有制國子歲貢六人蒙古二官從六品色目二官從  
七品漢人二官從七品第以入學名籍為差次公曰不  
變其法士何由進學國何以得材乃酌舊制立陞齋積



分等法其言曰國學立六齋下兩齋以初學者居之中  
兩齋治大學論語孟子中庸學詩者居之上兩齋治易  
詩書春秋禮記屬文者居之每季考學問進者以次第  
陞又必在學二年以上始與私試孟春月試經疑經義  
季月試策問古賦制誥章表蒙古色日試明經策問辭  
理俱優者為上准一分理優辭平者次之准半分歲終  
積至八分者充高第生以四十人為額員不必備惟取  
實才然後集賢禮部試其藝業及格者六人以充貢諸

生二年不能通一經及在學不滿半歲者並黜之中書  
奏行其法於是人人厲志讀書益多材學之士矣久之  
出知濱州丁內難不果上終喪超拜太史院使階朝散  
大夫至治之季司天以誤卜日下吏公曰陰陽之說多  
端未始會歸於一彼星官疇人各專家學弗知貫通豈  
有心而然哉由是獲免泰定二年選充江西福建道奉  
使宣撫江西俗頗譁訐獄訟滋章姦人因緣為市公訊  
之以情皆隨事決遣泉漳戍兵逞威肆暴凌蔑郡縣長

吏或白晝劫民財公痛繩之以法初括江南地時民或無地輸稅或地少輸多日虛加糧江西尤甚詔諭憲司覆實蠲免久弗施行公曰上欲澤加於民而憲司格之何也既杖屬吏俾憲使親行覆實免糧若干萬石閩憲職田每畝歲輸米三石民率破產償之公命準令送官其地左不能致者以秋成米價輸其直福建鹽漕分司古田江口商旅過者被擾公立罷之福清富民千家妄稱煮鹽避役公皆民之閩多先賢子孫或同編戶服役

公悉除之凡黜罷貪吏四百餘人興利除害數百事民  
大稱快天歷二年九月十有六日公以疾薨享年六十  
有七公平生寡言笑不妄交游儀貌奇偉望之儼然為  
學堅苦家貧借書讀之及在太史會朝廷輦宋三館圖  
籍置院中公晝夜誦讀精思深究故其學博洽而精通  
自六經諸史天文地理禮樂律歷下至陰陽五行醫藥  
卜筮無所不能而於經術為尤邃立言垂訓簡易明白  
不蹈故常以徇人不求新奇以驚世其於聖賢旨意益

多有所發焉所著易本說四卷繫辭旨略二卷蔡氏書  
傳詳說一卷春秋諸國統紀六卷大學四傳小註一卷  
中庸章句續解一卷論語言仁通旨二卷皇極經世書  
入式一卷外篇微旨四卷授時歷經串演撰八法一卷  
二至晷景攷二卷遺文若干卷公嘗言國家治平百年  
禮樂多沿舊制蓋樂本於律律本於氣當擇僻地為驗  
氣密室取金門之竹河內葭莩多方候之可以正樂音  
同度量列其事上之又得石律管一長尺有八寸外方

內圓中有隔隔有小竅蓋以通氣隔上九寸其空均直  
經三分以應黃鐘之數隔下九寸迤邐殺至管底徑二  
寸餘蓋聚其氣而上之疑即古所謂玉律者也既而公  
遷他官事遂寢臨川吳文正公覽公著述為之敬服屢  
嘆當世無知公者公薨贈翰林學士資善大夫上護軍  
追封汝南郡公諡文懿祖政贈中奉大夫護軍考義贈  
資善大夫上護軍俱追封汝南郡公祖妣劉氏妣桑氏  
俱追封汝南郡夫人配張氏封汝南郡夫人子男克明

世其業終候儀郎保章正女適知祁州申克強孫男某  
公母弟思恭蚤游成均有文名由京學官入教國子歷  
尹冀寧之榆次光之固始安之高陽並著能稱今以奉  
訓大夫國子監丞致仕至元九年二月甲子監丞買地  
京城齊化門東大路之陽奉考府君及公葬焉以天爵  
少從公學故以墓隧之文見屬嘗觀漢碑門生為師作  
者居多又載人各出錢幾何共相其役顧天爵迂疎何  
以有此謹述公歷官治行論著卒葬而為之銘銘曰

經世之學本諸儒臣孰啟其原六籍三墳明乎天人達  
乎物理成已成物罔不由此巍巍世皇撫有萬邦建官  
任人治具畢張周覽乾象攷正歷紀爰立膠序樂育多  
士一時鴻碩曰許與楊亦有羣英作式四方公學堅苦  
博觀載籍於易春秋獨探其蹟八師壁雍時咏菁莪勗  
其學徒以弦以歌由司星厯進太史職率其官屬推步  
弗忒在昔唐虞民底時雍三光以全五典克從羲和授  
時司徒典樂於皇我朝惟古是倣世皇在御百度惟新



匡飾治化無競維人禮樂百年是圖是究允懷先哲不  
尚有舊都城之東鬱鬱新阡碑無愧辭過者式焉

元故翰林侍講學士知制誥同脩國史贈江浙行  
中書省叅知政事袁文清公墓誌銘

國家有文學博洽之儒翰林侍講學士袁公諱桷字伯  
長慶元鄞縣人也故宋少傅同知樞密院事資政殿大  
學士贈太師越國公諱韶之曾孫中散大夫知嚴州軍  
州事皇元贈嘉議大夫禮部尚書上輕車都尉會稽郡

侯諱似道之孫朝列大夫同知處州路總管府事贈中奉大夫浙東道宣慰使都元帥護軍會稽郡公諱洪之子年二十餘憲府薦茂異於行省授麗澤書院山長不就大德初羣賢萃於本朝聞公才名擢翰林國史院檢閱官秩滿陞應奉翰林文字同知制誥兼國史院編修官遂遷修撰凡歷兩考遷待制又再任進拜集賢直學士久之移疾而還復遣使召入集賢仍直學士未幾改翰林直學士知制誥同修國史明年遷拜侍講積階奉

議大夫泰定初辭歸四年八月三日以疾終於家享年六十有二是歲十有一月某日葬鄞縣上水慶遠塋之原訃聞制贈中奉大夫江浙等處行中書省叅知政事護軍追封陳留郡公諡文清維袁氏遠有世序宋嘉祐間有諱輟者舉進士歷官朝奉大夫知處州其後龍圖閣學士正獻公燮兵部尚書正肅公甫父子俱號名儒越公於祥符丞輟為曾孫師事正獻尹臨安十餘年為政嚴明事載之史公生富貴為學清苦讀書每至達旦

長從尚書王公應麟講求典故制度之學又從天台舒岳祥習詞章既又接見中原文獻之淵懿故其學問核實而精深非端事記覽譁衆取寵者所可擬也世祖皇帝初得江南故宋衣冠之裔多錄用之而宣慰公屢被恩命公在館閣一時耆舊若閔公復程公鉅夫王公構雅愛敬公故蒙薦擢時海宇乂安年穀豐衍而詞林清華無官守言責日惟撰著為職朝廷有大制作公從諸老獲議其事成宗皇帝初建南郊公進十議曰天無二

曰天尤不得有二五帝不得謂之天作昊天五帝議祭  
天歲或為九或為二作祭天名數議圜丘不見於五經  
郊不見於周官作圜丘非郊議后土社也作后土即社  
議三歲一郊非古也作祭天無間歲議燔柴見於古經  
周官以禋祀為天其義各旨作燔柴泰壇議祭天之牛  
角繭栗用牲於郊牛二合配而言之增羣祀而合祠非  
周公之制矣作郊不當立從祀議郊質而尊之義也明  
堂文而親之義也作郊明堂禮義異制議郊用辛魯禮

也卜不得常為辛作郊非辛日議北郊不見於三禮尊地而遵北郊鄭玄之說也作北郊議禮官推其博多採用之仁宗皇帝自居潛宮深厭吏弊及其即位乃出獨斷設進士科以取士貢舉舊法時人無能知者有司率諮於公而後行及廷試公為讀卷官二會試考官一鄉試考官二取文務求實學士論咸服公在詞林幾三十年扈從於上京凡五朝廷制冊勲臣碑版多出其手嘗奉詔修成宗武宗仁宗三朝大典至治中鄆王栢柱獨

東國鈞作新憲度號令宣布公有力焉詔繪王像命公作贊賜之公述君臣交修之義以勵王王尤重公學識銳欲撰述遼宋金史責成於公公亦奮然自任條具凡例及所當用典冊陳之是皆本諸故家之所聞見習於師友之所討論非牽合剽襲漫焉以趨時好而已未幾國有大故事不果行公歿二十餘年今天子特勅大臣董撰三史先朝故老存者無幾衆獨於公追思不忘會遣使者分行郡國網羅遺文故事而江南舊家尚多畏

忌祕其所藏不敢送官公之孫同知諸暨州事巖乃以家書數千卷來上三史書成蓋有所助初世祖建宗廟於京師至仁宗崩七廟已滿乃結綺為室以附英皇親行祫享之禮始議增廣廟制乃作新廟為十五室公亦預其議公曾祖妣陳氏封周國夫人祖妣王氏妣史氏楊氏元配鄭氏並追贈會稽郡夫人子男二人瓘瑾女四人長適同知袁州路總管府事趙孟貫次適故觀文殿大學士趙某孫由錫次適故相史忠定王玄孫公佾



次適處州儒學錄余應渠孫男曦以公蔭入官既進遺書於朝遂擢秘書監著作郎次尋旼孫女適浮梁州判官范程次許適陳某次幼曾孫男二公生七日史夫人卒長事郡公極孝教子孫有法待宗族盡恩意中外姻婭皆宋名族家庭嚴肅吉凶之禮不廢其舊規每以務學修行勗故家子弟俾自愛重無為門戶羞公喜薦士士有所長極口稱道公之南歸會史館將修英皇實錄令中書左丞呂思誠翰林直學士宋瑩河南行省叅政

王守誠皆新擢第公薦其才堪論撰天爵與馬公於近代禮樂之因革官閥之遷次朝士大夫之族系九流諸子之略錄悉能推本源委而言其歸趣袁氏自越公喜藏書至公收覽益富嘗曰余少讀書有五失泛觀而無擇其失博而寡要好古人言行意常退縮不敢望其失懦而無立纂錄故實一未終而屢更端其失勞而無成聞人之長將疾趨從之輒出其後其失欲速而好高喜學為文未能蓄其本其失又甚者也公之斯言深中學

者貪多苟且之弊公為文辭興雅奇麗日與虞公集馬  
公祖常王公士熙作為古文論議迭相師友間為歌詩  
倡酬遂以文章名海內士咸以為師法文體為之一變  
公有易說若干卷春秋說若干卷清容居士集五十卷  
嗟夫昔宋南遷浙東之學以多識為主貫穿經史考覈  
百家自天官律歷井田王制兵法民政該通曲委必欲  
措諸實用不為空言然百年以來典刑風流日遠故公  
之葬謹序而銘之來者尚有所徵乎銘曰

懿歟袁公博極羣書矢辭淵淵佩玉舒舒海宇既一興  
自江左諸老見之孰不曰可進掌帝制列官詞林討論  
憲度講求古今於時朝廷日興典禮祖廟天郊以享以  
祀三聖信史纂述宏休羣士選舉務拔其尤不有學識  
孰承其責惟公雍容斟酌損益陳編墜簡公證其訛識  
時歸休山林浩歌世有鄙夫空空如也覆忌多能係時  
用舍公富著述燦若日星銘詩弗刊垂後是程

元故資德大夫御史中丞贈摠忠宣憲協正功臣

魏郡馬文貞公墓誌銘

至元四年戊寅三月丙午資德大夫御史中丞知經筵  
事馬公薨於光州居第正寢有司以聞制贈摠忠宣憲  
協正功臣河南江北等處行中書省右丞上護軍追封  
魏郡公諡文貞其年四月壬申葬郡城之北平原鄉西  
樊里公諱祖常字伯庸世本永吉特部族居靜州之天山  
四世祖實喇濟蘇金季為鳳翔兵馬判官死節贈恒州  
刺史祀褒忠廟官名司馬子孫因以立氏曾祖伊克紐爾

從世祖皇帝伐宋留汴饋餼六師卒官禮部尚書贈推  
忠宣力翊運功臣僉樞密院事謚忠懿侯祖世昌行尚  
書省左右司郎中贈嘉議大夫吏部尚書父潤朝列大  
夫同知漳州路事贈中奉大夫河南行中書省叅知政  
事封梁郡公母梁郡夫人楊氏公幼有異稟年六七歲  
即知讀書歲時拜賀長者以錢賜之他日行過市中悉  
以買書十歲侍梁公宦游儀真月朔列燭於庭燭歌側  
延燒屋壁公解衣沃水撲滅梁公走視火已救止問其

故對曰恐驚長者蜀儒張公頴講學儀真公時未冠質以經史疑義數十張公奇之公少慕古學非三代兩漢之書弗好也梁公嘗語公曰吾祖有德未盡發吾官州郡不克施汝其能大吾門乎公愈力學仁宗皇帝深厭吏弊思致真儒丕變治化延祐元年詔開貢舉網羅賢才公偕其弟祖孝俱薦於鄉公擢第一明年會試禮部又俱中選公仍第一廷試則以國人居其首公居第二甲第一人隱然名動京師授應奉翰林文字承事郎同

知制誥兼國史院編修官日與會稽袁公桷東平王公士熙以文章相淬礪三年冬擢拜監察御史時天子臨御已久猶居東宮而羣下每因燕飲輒有奏請公上疏曰大內正衙古帝王視朝之所今大明殿是也陛下聖德謙恭尚居東宮之舊願御大明正衙鎮服華夏夫陛下承天地祖宗之重奉養當極精美調攝宜進玉食至於酒醴固穀麥所為然近侍進御之際可思一獻百拜之義且百官奏事古有朝儀今承平百年文物宜備或



三日二日一御朝聽政宰相羣臣以次奏對御史執簡  
史官執筆縉紳佩玉儼立左右雖有懷姙利已乞官賞  
者亦不敢公出諸口矣初立英廟為皇太子公請慎選  
師傅朝夕輔養下至臣僕亦宜精擇天下休戚實原乎  
此丞相特們德爾專權擅勢大作威福公率同列論奏  
其惡又撫其貪縱不法十餘事劾之仁宗震怒命罷其  
政事將治以罪賴太后救解得免公又言贊畫省務允  
宜得人而叅議博囉劉吉為丞相腹心交通賄賂左右

司都事馮翌霄劉允忠依憑權勢僥倖圖進遂皆黜退  
又言秦州山移實惟大變非遣使祈謝賑恤一方而可  
弭也大臣各宜辭官讓能畏懼修省史載平公石言之  
語世世為監今山移之譴豈在野有當用不用之賢在  
官有當言不言之佞所以感召不動之物而動也於是  
宰臣皆家居待罪河西廉訪使杜某以赦後殺人者作  
赦前原之肆意廢法大都路總管范某以盜竊家貲自  
至兵馬司督問侵官失體並劾罷之又薦前中書平章

蕭拜珠左丞王毅曩在政府數與丞相抗論是非當實  
機要勿令外補朝廷緩急有所賴焉前監察御史徹爾  
特穆爾中書叅議韓若愚皆被丞相誣罔排擯早賜錄  
用翰林承旨劉敏中精力尚強歛身高蹈可賜半俸以  
厲廉隅國子司業吳澄通經博古海內名儒可進兩院  
以備訪問翰林修撰陳觀刑部主事史惟良其材方嚴  
宜居諫職公論刑獄尤本哀矜嘗請量移流罪及論禁  
挾弓矢曰國家不嗜殺人仁覆生齒邇年屢發德音未

嘗量移流徒竊慮推恩或有未悉夫大辟死罪反被赦  
原而減死流徒獨不蒙澤豈法之平允哉今後果應長  
流請別定制否則驗情重輕度地善惡遇恩內徙幸甚  
又曰近制漢人百人以上執弓矢獵者處極刑百人以  
下流遠方微及一兔之獲亦各有罪方今條格已有禁  
弓矢之科及聚衆之制又復為此錯綜而網羅之誠恐  
愚氓舉足蹈罪實可憐憫蓋公建白剴切故多見於施  
行五年改宣政院經歷月餘辭歸起為社稷署令被命

罷雜事於泉南七年正月仁宗賓天特們德爾復居相  
位睚眦必報屢欲害公未得左遷公開平縣尹開平治  
行都供億浩繁訟獄繁多蓋欲因事深中傷之公退居  
浮光之野詠歌詩書漠然不以介意久之丞相不得專  
政憂憤而死鄆忠獻王栢柱獨相旌別邪正而陞黜之  
召公為翰林待制泰定元年三月詔建儲宮尋開經筵  
公拜典寶少監階奉直大夫四月天子清暑上京以講  
官多老臣乃命集賢侍讀王公結祕書少監虞公集及

公執經從行明年拜太子左贊善尋遷翰林直學士仍兼贊善方儲宮之建也一時賓贊之選責成輔導之意蓋甚重焉公述古昔調護輔翼之事上之又因成均釋奠陳太子視學之禮內廷出禮幣命公助祭三年考試大都鄉貢進士明年同知禮部貢舉取士八十五人又充廷試讀卷官是秋拜禮部尚書會祖母梁郡夫人張氏卒護喪南歸持服公事夫人克盡孝養初階官五品請於朝曰祖常幼亡母氏賴祖母鞠育有成願以封妻

恩讓封祖母於是夫人封慶都縣太君著於令至是公  
移文曰禮有為祖後者祖卒為祖母齊衰三年我朝典  
制雖不登載然某誤擢禮官理宜從厚無何使者起復  
轉右贊善尋命兼經筵官又明年公始至京復入禮部  
階朝散大夫旋又辭歸天歷二年文宗凡兩遣使召之  
方起至順初元知禮部貢舉復取士九十七人改燕王  
內尉又拜禮部階大中大夫公擇士務求實學空言浮  
詞悉棄不取中選者多知名於時拜叅議中書省事是

歲十月文宗舉百年曠典親祀南郊公充讀祝冊官叅  
定典儀禮成大賚四海侍祠官賜金及幣致仕官一品  
月給全俸二品半之三品及九品賜幣有差民年八十  
以上者表號高年耆德並免其家徭役公議事廟堂言  
簡而理明勅衛士飼馳馬者聽借民穴舍以居公曰衛  
士飼馳馬已有定居今不遵舊制徒使細民橫被驚擾  
且祖常官列三品尚無穴舍況細民乎奏復其舊建德  
之民遠遊被殺莫詰誰何歲餘妻以貧改嫁之後夫者



曰知汝夫之死乎我以汝故殺之未幾事覺法司以不  
首坐之公曰綱常所係當以重論以責天下之為人婦  
者制可其請二年拜治書侍御史遷侍御史進中奉大  
夫特賜犀帶及御書奎章閣記內宴服七襲金玉腰帶  
各一三年轉徽政院副使明年拜江南行臺御史中丞  
六月今上皇帝即位召公及翰林承旨許公師敬等赴  
上都共議新政賜公白金二百兩中統楮幣二百足金  
織文綺四端遷同知徽政院事是月復命儒臣進講公

兼知經筵事公每進說必以祖宗故實經史大誼切於  
時政者為上陳之冀有所感悟焉是冬進拜御史中丞  
階資政大夫公風神秀異威嚴端重起居皆有禮法人  
亦望而畏之三為臺臣務以肅或撓憲度輒屏棄之西  
臺御史高坦劾同僚時禁酤酒而面有醉容公以風憲  
當存禮體糾劾務有其實今以酒容罪人苛細不持大  
體奏黜罷坦山東僉憲白元采按行曲阜以李經自陳  
不當賂衍聖公求為官屬及孔氏訟衍聖公不法數事

以聞公署其牘曰李經所首在赦令前宗人相姦事關  
名教元采聞之亦去江西僉憲任忙古帶以貪墨敗田  
廬奴僕在東阿者當沒入官公請以田廬供曲阜林廟  
祭享奴僕充洒埽戶從之公喜鑒拔後進及官中臺薦  
士尤衆故禮部尚書宋公本初至京師人無識者公揄  
揚其學遂大有名嘗擬進汴處士吳炳官風紀上曰朕  
新擢炳為藝文簿汝俟其至用之未晚二年拜樞密副  
使公言軍將子弟驕脆不勝任使當立武學教習兵法

庶人挽強蹶張徒老草野當建武舉儲材以備非常不  
報公遂辭歸復拜南臺中丞階資德大夫又遷西臺疾  
不赴薨年六十公娶索氏常州錄事判官某之女次奇  
味氏河南鎮守千戶和尚之女索氏封梁郡夫人婦德  
母儀宗黨範之子男二人武子太常太祝中書省掾奎  
章閣典籤兼經筵叅贊官今承務郎湖廣行中書省檢  
校官文子徵事郎祕書監著作郎孫男三人女二人俱  
幼公自先世皆事華學號稱衣冠聞族至公位益光顯

文學政術為時名臣尤篤友義昆季子孫及宗族孤寒者悉收而教養之舉進士釋褐上庠者凡數十人公上言本朝及諸國人既肄業國學講誦孔孟遺書當革易故俗敬事諸母以厚彝倫天下高其議公自少至老好學彌篤雖在扈從手亦未嘗釋卷喜為歌詩每嘆魏晉以降文氣卑弱故修辭立言追古作者其為訓誥富麗典雅既出詞林遷他官而勲閥貴胄褒贈父祖猶請公為之辭文宗最喜公文嘗擬稿進上曰孰謂中原無碩

儒乎文宗北幸還駐龍虎臺公奏事幄殿勅近侍給筆  
札命公榻前賦詩卒章言兩京巡幸非以遊豫蓋為民  
爾因詩以寓規諫上覽之甚悅適太官進食乃輟尚食  
以賜今上聞公瘡疾特免朝會行禮命光祿日給尚醢  
二尊服藥療治近世儒臣恩遇無以踰公矣始梁公監  
光州有惠政公亦愛其風土因買田築室家焉嘗贊郡  
守修孔子廟倡秀民興於學接光人謙遜以和光人益  
敬愛公或有訟者聞公一言即解去不復詣府公薨光

人老幼咸悲思之公有文集若干卷奉詔修英廟實錄  
譯潤皇圖大訓承華事略編集列後金鑑千秋記略共  
若干卷昔者公以御史監試國子天爵偶忝科名殆遷  
應奉間以所作就正於公公曰勉之當負斯文之任於  
十年後也嗚呼天爵學日荒落不克副公所教公之厚  
德其能忘歟謹考次其世族官封薨葬歲月與其始終  
之大節合而誌於其墓且銘之銘曰

維天生才無間中外封殖樂育治世攸賴皇有中國萬

方會同征伐謀獻屬諸羣雄維公之先奮興西北佐官  
前朝矢死靡忒忠懿父子種德百年世載衣冠至公益  
宣黼黻皇猷文華有爛邈視魏晉上本周漢帝命褒嘉  
中原碩儒汝執憲度往肅姦諛正色立朝百僚震懾小  
臣以廉大臣以法公論刑獄平恕不苛念彼華人日陷  
網羅公於人才惟祇惟慎薦揚碩學裁抑躁進公在廟  
廊侃侃進言以厚倫紀以安黎元寶帶對衣賜賚繁舞  
儒臣遭逢孰步公武贈官贈諡爵以魏公恤典孔昭維



以勸忠瞻彼行潦朝盈夕涸江漢滔滔源遠流濩維馬  
有氏七世於茲忠懿啟之魏公大之百爾子孫思慎其  
守詩書之傳允克悠久

滋溪文稿卷九

欽定四庫全書

滋溪文稿卷十

元 蘓天爵 撰

碑誌

元故少中大夫江西湖東道肅政廉訪使趙忠敏

公神道碑銘

世祖皇帝臨御中國總覽豪俊布列有位故治功興而  
法制立一時賢材之盛或奮由農畝或舉於戎行或出

於詩禮之族或興於勲伐之裔若趙公者蓋其人乎公諱秉正字公亮河北河南道提刑按察使賜太保儀同三司上柱國定國襄穆公璿之子知太史院侍儀事贈金紫光祿大夫大司徒定國文昭公秉溫之弟也起家武畧將軍新軍上千戶官至少中大夫江西湖東道肅政廉訪使享年六十有七以至大元年秋七月某甲子薨於當塗寓舍二年夏五月某甲子葬於順德南和縣李馬原後三十年制贈公嘉議大夫禮部尚書上輟車

都尉天水郡侯謚忠敏始刻石以文曰初太祖皇帝兵  
至飛狐襄穆舉城來歸從國王穆呼哩戡定河朔由監  
中山家焉有子十一人公次居六生有異質襄穆奇之  
曰吾將兵不妄誅夷子孫庶有賢者中統庚申世祖歸  
自鄆渚道出中山襄穆以潛藩襄臣持牛酒郊迎上為  
下馬坐帳中襄穆進酒公從拜其後進止雍容上偉其  
貌命列宿衛至元十年襄陽降詔丞相巴延大舉南伐  
選材勇以充將校大臣以公名薦即授新軍上千戶佩

銀符從兵攻郢又破黃渠以功陞宣武將軍換金符宋  
社既墟新令未洽慮民復叛命諸州置管軍總管府分  
守其地公調徽州尋又置萬戶府兩府莫知所長而萬  
戶受賂輒為人奏官賞公還京師求解其職久之臺臣  
知公賢能奏僉江西湖東道提刑按察司事上可其奏  
豐城尹張某夤緣東宮近侍得官肆為貪暴公按得之  
尹恚曰吾昔受東宮教公曰教若殘赤子乎尹陰令其  
子訟寃於朝吏不敢書尹獄辭公曰苟得罪獨身坐不

以累若等也卒論如律吉鎮守萬戶蘓某橫恣不法樹  
黨與十人號十虎持郡縣短長縱虐於民公擒其黨一  
人急索其家得刀斧弓矢並新屠牛獄具即杖殺之民  
爭愬其枉盡取九人治之萬戶誣公擅殺行省臣曰州  
郡置兵本以為民除暴今自為暴可乎僉事用法擊賊  
非擅殺也萬戶慚憤而退江南既歸版圖後生漸趨刀  
筆之習公行部大郡遣吏奉書幣迎故縉紳先生劉辰  
翁鄧光薦黎立武舍於學宮命諸生從授經訓業成者

復其家士風由是浸盛移僉漢中換朝列大夫度同列不可與為居三月遂移病去明八月詔改提刑按察為肅政廉訪起公僉憲河南懷孟有閒田若干頃民佃其中竊位方面者奪為已有公復還之於民元貞初元遷山東道廉訪副使益都宣慰使喇實奏請東海之濱土皆膏腴宜為屯田以養軍士公言田實潟鹵不可以耕喇實罔上病民言不可信朝廷為罷宣慰使時成宗皇帝新即位慎選大臣尤以臺憲為重詔拜閩省平章徹

爾為南臺大夫江西行省左丞董士選為中丞公為治  
書侍御史大夫先朝舊臣威重若神以公高年獨加敬  
禮公為大夫言各道廉訪司糾郡國官吏宜選御史察  
各道臧否而黜陟之則職業舉大夫從其言而憲紀益  
振江浙省臣為姦利事覺激怒東朝廷議遣官雜治公  
分臺以省具得鹽司及省中大吏贓狀皆以罪黜大德  
五年拜江西廉訪使民間公來懽曰是能縛十虎者耶  
貪吏望風或自引退寧州盜殺大賈數年不獲公閱其



辭以大賈嘗舍逆旅意盜為逆旅主人立捕至即服明年公告老臺臣不許趣起視事又明年公復求去官屬苦留之乃夜乘舟入匡廬山尋載其家北還至當塗悅其土俗卜居郡城之東歲丁未江南大饑有司勸富民出粟粟不能具民且死公謂吏曰爾以嚴刑威之粟終不可得也當以善言諭之吏如公言果得粟以活民甚衆公少善騎射嘗獵於野猝與虎遇衆皆辟易公引弓一發而踣從畋柳林近侍較射為樂公射輒中及學書

筆力端勁以顏魯公為法公嗜讀書不尚章句獨喜古人奇節偉行雖在行陳寘書袖間下馬休輒誦讀軍中相謂趙生丞相渡江盡召諸將議守襄郢統軍萬戶韓某堅請公留丞相不許宋平公出橐中金購書萬卷輦致其家以其副分遺順德懷孟許三郡學官北方之士賴焉公嘗言自昔中原文獻之會兵戈以來詩書禮樂之習微矣雖公卿大家亦多雜用俗禮乃與文昭公為家訓以示子孫襄穆公薨親舊欲用浮屠公曰吾衣冠

族當守禮經於是衰經喪祭一遵古制郡人化之公娶張氏再娶劉氏子男諱先公卒儀承事郎建德路壽昌縣尹兼勸農事儼將仕佐郎河北河南道肅政廉訪司架閣庫管勾兼照磨侃不仕女適承直郎揚州路泰興縣尹兼勸農事劉節孫男時可時充時養時貞時會時泰時立孫女五人趙氏世家飛狐襄穆始兆中山公母定國夫人楊氏別塋順德公疾語諸子曰吾母愛我善事即死葬我母傍遂從遺命始公僉憲河南憫世俗用

刑之酷乃上言曰昔唐太宗因閱銅人見人之五臟皆  
繫於背詔天下勿鞭背可謂仁君愛民萬世龜鑑今朝  
廷用刑有制而有司不詳科條輒因暴怒褫衣鞭背致  
人於死深負國家好生之德廟堂是其言遂著為令銘  
曰

於赫世皇立賢無方用適其宜治具畢張維人之生才  
有萬彙成德之士施用不器偉歟趙公悃悞無華奮其  
才能益大厥家飛狐被邊俗喜騎射及家中原詩禮日

化始從丞相執戈戎行南土既平分持憲綱典刑嚴嚴  
風猷凜凜發擿姦貪民獲奠枕洪惟皇祖建臺之初一  
時老成執法不逾時方治平人皆尚行風化肅雍州部  
清整公在憲府三十年餘用人之效此其權輿維古善  
人為國之紀嗟爾子孫尚續公祉

元故御史中丞曹文貞公祠堂碑銘

有序

贈體忠守憲功臣河內行省左丞魯郡曹文貞公諱伯  
啟既葬碣山其令尹謀諸耆老曰公家是邑仕皇朝清

規重德師表一世天下慕其風采矧吾邑人詎能忘乎  
衆是其言相率為祠於博化里奉公像而祀之遣人至  
維揚請曰昔者公薨天子勅儒臣刻銘神道今祠宇既  
作繫牲有石願撫公遺事序而詩之重為吾邑人勸是  
所望也天爵弱冠獲拜公履前公教誨甚至其敢以固  
陋辭國初東平嚴侯興學作士公往遊焉師事翰林承  
旨李公謙故其為人廉靜溫雅筮仕碭山文學掾歷鄆  
州學正冀州教授訓諸生有法及見於用則以洗冤澤

物為心嘗主婺州蘭溪簿尉獲盜三十械徇諸市公曰盜無左驗其孰信乎未幾果得真盜尉以是黜累遷常州路推官豪民黃甲恃財殺人賂佃客坐之公獻得其情申坐殺人者罪御史潘昂霄憲副王侯交薦其賢擢拜西臺御史關輔自許文正公倡鳴道學以淑多士公請於朝建祠以表其功築室以訓來學涇陽民誣其尹不法公核其實抵民以罪蜀僉憲以苛刻聞公列其狀去之善善惡惡克協於理延祐元年由中臺都事除刑

部侍郎時相擅政威焰赫然一日盛怒召公等至曰西  
僧訟某之罪何為久弗治也衆莫敢對公徐進曰某罪  
犯在赦前故弗敢治相益怒左丞起進曰曹侍郎素稱  
廉直某罪誠如所言相怒稍解宛平縣盜官帑事覺宰  
臣欲誅其守者公曰守者罪不至死杖而遣之或謂公  
屢忤宰執盍稱疾避之公曰禍福命也第謹吾職而已  
久之出為真定路總管治尚寬簡民便安之遷司農丞  
拜南行臺治書轉福建廉使未行改右司郎中至治元



年遷遼東廉使京師西山勅大建佛廬御史言歲饑民貧宜緩其役近侍有恚臺諫者激怒於主上而御史以讒死公抗章言臺臣某叨塵清要拱默苟容使昭代有殺諫臣之名宜示顯責用儆具臣時避其言召為集賢侍講學士拜侍御史奉詔刪訂條格公曰刑貴適中今民犯罪既黜而杖復加流竄是一人身備五刑故生還者百無一二殊乖列聖子育元元之盛德法當改易丞相是其說會公除浙西廉使不果泰定初元公引年北

歸優游鄉社。碭人樂公之德表所居為曹公里。文皇即祚以廉使重任。詔徵耆舊為之。公落致仕使淮東時。方旱歉。飭有司發粟賑窮乏。及聞中丞之命。則曰。吾年且八十。尚忘知止之戒乎。公平生以人才為任。在中臺時。薦名士若干人。為侍讀。考試國子拔呂思誠。姚紱。寘前列。及監浙省鄉貢。選士尤精。雲南僉憲范震言宰臣罔上欺下。不報。范飲恨死。公具其事書於太史。真州守呂世英以剛直獲罪。公白其枉。進擢風紀。公性莊肅。奉身

清約雖為貴官飲食服用不異於儒素公退讀書不倦  
教子孫嚴而有禮諸子晉寧縣尹震亨臨江儒學教授  
貢亨福建鹽司經歷泰亨江南行臺御史復亨陝西行  
臺掾履亨佩服公訓皆克有聞公嘗嘆曰比見官治民  
俗歲殊日異昔熟見聞以為當然非上之人作新丕變  
未易復舊貫也嗚呼昔我世祖皇帝既定海宇建官立  
制任賢使能以興治功至於本乎詩書之訓發為仁義  
之言深謀遠圖贊襄國論以成天下之務者唯一二儒

臣是所賴焉公益及事至元故老學有本原其處心平易而不苛其為政安靜而不擾用能敷歷中外五十餘年海內推為鉅人長者今已矣典刑風裁豈一鄉一邑所當法哉詩曰

碣山之墟河流訇磕昔產豪雄奮烈慷慨溫溫魯公獨稱鉅儒長裾玉佩步武其餘天啟治平羣賢林立如彼威鳳有道斯集入贊國論出總憲綱譏排姦倖扶植善良心焉和平行焉忠厚興治善俗允屬耆舊君子豈弟

天厚其門有祿有年蕃蕃子孫維古先哲道德可仰里社尸之來格來享咨爾礪人匪公曷師祠以報德徵此銘詩

故集賢大學士光祿大夫李文簡公神道碑

仁宗皇帝臨御之初方內宴寧乃興文治一時賢能材藝之士悉置左右皇慶元年秋八月某甲子特命中大夫常州路總管李公為吏部尚書即日遣使召之蓋上在潛邸已聞公名既至禮遇隆重字而不名明年公請

致仕上不允尋又以為言上曰仲賓舊人宣力有年不  
可令去禁近超拜集賢大學士榮祿大夫當是時朝之  
宿學碩儒名能文辭翰墨者若洺水劉公賡吳興趙公  
孟頫保定郭公貫清河元公明善皆被眷顧士林欣慕  
以為榮公居其間年德俱尊國有大政則偕諸老議之  
衣冠整肅言論從容廷臣莫不起敬世戚大家欲銘勲  
伐德業者必屬公等論撰書篆子孫始以為孝公翰墨  
餘暇善圖古竹木石底幾王維文同之高致而達官顯

人爭欲得之求者日踵門公弗厭也久之公以疾辭上  
不得已許之進官光祿大夫勅賜幣帛酒饌俾使者護  
送南歸又擢其子士行知泗州使侍養焉嗚呼仁宗所  
以優禮耆艾崇尚藝文於此蓋可觀矣公享年七十有  
六以延祐七年十月二十四日卒於維揚葬江都縣某  
鄉某原後二十二年其孫希閔請於朝始贈公翰林學  
士承旨柱國追封薊國公謚文簡公諱衍字仲賓也世  
為燕人考府君以儒名兼通天文律歷之學世祖皇帝

聞其名召而問之以非官守不敢言公少警敏有俊才  
世祖新作都城崇奉宗廟公起家將仕佐郎太常太祀  
兼奉禮郎尋又命兼檢討久之遷承務郎淮東道宣慰  
使司都事至元十九年宣慰司罷轉江浙行省左右司  
員外郎二十四年改江淮行省員外郎朝廷遣官稽核  
郡縣錢糧公分江浙省人不以為苛成均既立詔徵江  
淮學廩之餘以給師生公又承命往士不以為擾二十  
八年遷承直郎都功德使司經歷三十一年世祖賓天



成宗繼序詔罷征安南兵釋其陪臣陶子奇等擢拜公  
朝請大夫禮部侍郎往諭其國賜金虎符佩之以兵部  
郎中蕭泰登為之副別賜衣物鞍勒有差時交廣新剗  
於兵人憚其行公無難色命有司置騎傳萬夫長部兵  
從行安南聞有詔使且疑且懼公至宣聖天子休兵息  
民一視同仁之德意國王及其臣民拜服以聽感戴懼  
呼大喜過望歸所盜邊地二百里遣其臣奉表謝罪遺  
公等橐中裝甚厚皆辭不受益之再三終讓却之愈大

感服元貞改元九月公偕使者八覲錫賚蕃渥明年公  
請補外除同知嘉興路總管府事再遷婺州佐兩郡凡  
十年時天下無事年穀豐穰法制寬簡士大夫亦多樂  
外官公操韻高潔又喜吳越風土所在興學訓士暇則  
自放山水間蓋隱然承平官府之舊民亦悅其安靜之  
化焉公有吏能嘗奉詔錄囚江南或疑不能決者公得  
其情多所平反常州學田萬畝僧冒種三之一公言行  
省復歸諸士在郡歲餘被召公既貴卹典上及三世曾

祖大臨贈翰林侍讀學士中奉大夫護軍范陽郡公謚  
恭懿祖襄贈資善大夫大司農卿上護軍范陽郡公謚  
忠惠考居實贈榮祿大夫大司徒柱國薊國公謚文康  
曾祖妣馬氏祖妣陳氏俱追封范陽郡夫人妣苗氏繼  
妣張氏俱追封薊國夫人公元配曾氏追封薊國夫人  
繼王氏封薊國夫人子男士行世其學終奉訓大夫知  
黃巖州兼勸農事士昌江東憲史女士貴適奉議大夫  
惠州路總管府判官張汝霖士柔適王昇士能在室孫

男希閔溫州永嘉尉餘二人幼公性和厚人不見有喜  
愠家居不治生業子孫皆以清慎聞初表所居曰息齋  
晚號醉車先生作傳以自適天爵使憲淮東希閔請銘  
公墓昔公官集賢時天爵補國子員獲瞻拜公追思先  
朝故老漸已漸盡然則紀述先進言行非後生責乎銘  
曰

於皇仁宗方內晏寧崇儒稽古詠歌治平一時臣工來  
際昌運翰墨藝文咸啟其蘊雍容李公帝命褒嘉峻陟

崇班歷游清華公方少時恭侍太室典禮憲章討論遺  
逸出佐省幕婉畫是咨帝念南交久罷吾師咨汝臣衍  
往宣予澤公偕陪臣來貢玉帛歷官列郡敷惠在民召  
侍左右允維舊臣帝眷方隆公遽告老白髮蒼顏天錫  
壽考爰新卜兆其下邦溝矢銘貞石尚永公休

故河東山西道肅政廉訪使贈禮部尚書王正肅  
侯墓誌銘

朝列大夫河東山西道肅政廉訪使贈嘉議大夫禮部

尚書上輕車都尉追封太原郡侯謚正肅王公諱仁字  
仲安由祖以上世家雲中譜亡逸其諱考諱世明國初  
從兵破汴俘匠千人詔佩金符領其衆久之擢知中山  
府事因留家焉公幼襲父官已而讓其弟刮磨豪習從  
師問學卓然以古人自期由是名聞燕趙間至元十二  
年王師渡江下江陵詔文章廉文正公鎮撫其地承制  
除三品以下官廉公求名士與偕公在選中至則授歸  
州按撫副使因其土俗治以簡靜民便安之無何嵯峒

諸蠻來歸公與有力明年宋亡又明年江南諸道置提  
刑按察司公以才擢僉江東按察司事是時海內治平  
方臻朝廷屢下詔書訓農興學條利除弊中外材能之  
臣亦皆凜凜思樹聲名以需進用而憲司尤極一時之  
選公於其時歷僉淮西山東燕南按察司事所至郡縣  
獎善拔惡勇於有為故君子聞之為之興起貪邪之人  
或自引去雖劾其罪亦言無所寬饒之監郡烏拉齊貪  
汙病民順德監郡多羅岱盜用官帑公發其事皆伏辜

故相順德忠獻王由太宗正拜湖廣行省平章道出真  
定謂公曰居官難居憲司又難治罪奪職而人弗怨此  
其尤難也使官風紀者皆然而人寧有負冤者歟會改  
提刑按察司為肅政廉訪公移僉山北廉訪司事遷陝  
西副使改河南副使皆移病不赴大德九年徵拜治書  
侍御史議者以京官任劇宜增秩以優其祿公曰御史  
之職在進賢退不肖悅衆要譽非所當為也或請檢江  
淮閒田募民佃作歲益得租若干萬石公言自宋金亡



治平日久編戶益滋間田無有也議遂寢無幾以疾辭  
歸旋有河東之命復辭以疾公為人孝友廉退少喪厥  
父勺水不飲者三日既葬居倚廬未嘗輒至私室及官  
淮西妣夫人卒願終喪制有司以法不許公曰親喪三  
年隆古之制尚忍以例言耶遂棄官去初在歸州官屬  
饋遺一無所受從者私受富人金百兩公弗知也是夕  
夢若神人來語其事覺而詰之即命以金還其主官屬  
異之多以廉自飭歸老於家築室唐水之側日讀伊洛

諸書怡然若有得焉有詩五卷藏於家以至大之四年  
八月某日卒享年七十有一某年某月某日葬安喜縣  
九真鄉之原公娶史氏早卒再娶其姊俱追封太原郡  
夫人子男曰簡疾不仕曰靜承直郎侍儀通事舍人銘  
曰

允矣王公秉德維恭介介其守不逾初終公在至元繡  
衣持憲鋤姦擢良列城用勸靡侈於怨弗牽於恩克協  
於中休有令聞晚起於家治書烏府諤諤昌言以規以

補相彼唐水薄言屏居進退雍容風節偉如九真之原  
公墓有歸載德銘詩愛詔無已

元故少中大夫江北淮東道提刑按察使董公神  
道碑銘

董氏之族居真定槁城者為最盛公其一也公諱源字  
巨源四世祖提金洺州防禦使曾祖公毅祖簡再世弗  
顯父思誠舉進士知名妣許氏公生七年從親避地居  
河南之永寧讀其父書稍長而有俊才又多謀畧金將

亡父母俱卒槁殯永寧之野未幾兵興公被俘一大帥  
帳下同俘者多被殺公以儒生得存帥命教其子弟有  
間徑歸永寧訪其親遺骸兵荒之餘暴骨如莽公嚙指  
漣血方求得之負而北還崎嶇艱危始達鄉里既葬依  
宗人槁城令文炳以居復師事翰林王公若虛王公在  
金時擅重名至是及門者衆獨推公為第一遂挾其能  
游諸公間名聲藉甚一時碩儒若王公磐李公冶姚公  
樞李公槃張公肅高公鳴蓋其交友中書楊公太保劉

公丞相史公尤奇其材共以國士許之國家初興方事戎旅楊公以征南行省史公以行軍萬戶俱治兵於外先後以幕府辟公公辭不應或問其故弗答也及世祖御極更新庶政四方豪傑悉起而為之用於是史公承詔宣撫河南復薦公為經歷官乃慨然就職曰時可以行吾學矣征謀治化多資於公上聞其名召與語奇之留置左右中統三年春山東守將李壇陰結宋人據濟南叛史公已居相位分省將兵往征之以公為左司郎

中是時朝廷肇建官儀每除拜猶令翰林行制以訓勅  
之告公之詞曰董某秉心端慤處事詳明草軍前之檄  
孰比陳琳談當世之事共推王猛宜須顯幄以佐行臺  
尚盡乃心克成厥績公請周城樹柵遏其侵軼使賊無  
外援城中食盡則自降矣已而果然瓊既伏誅改行省  
為濟南濱棣益都等路宣慰司復以公為叅議諸侯王  
唐古帥蒙古軍士萬人鎮益都王以齊人向從賊亂欲  
縱兵誅夷公曰亂者瓊耳民實何罪瓊既授首餘皆王

民今欲兵之是激其為亂也因極陳古昔殲厥渠魁芟  
從罔治之訓以諷王王是其言齊人賴以全活者無慮  
萬數至元四年遷轉法行調西京路判官六年秋上念  
都國囚在獄者或多寃滯詔中書選官決之公偕斷事  
官特穆爾分行西夏中興諸路周厯沙漠蓋萬餘里所  
決遣者悉稱平允九年遷奉訓大夫知林州州無屬縣  
得親治民公嚴法以馭吏布惠以養民民悅其政如父  
母焉朝廷滋以為材遂擢朝列大夫山北遼東道提刑

按察副使按行郡縣風采聳然監察御史表其廉能十六年起拜少中大夫江北淮東道提行按察使公以老疾辭上曰江淮新附之邦民尚未洽吾元聲教非得老成舊臣孰能撫綏而鎮安之朕固知卿高年其乘輶傳以往公整齊其大體闊畧其細故一以敦俗興化惠安元元為務歲餘江淮之民樂其清簡之治為吏者恥其貪汚之行皆仰公若神明焉公語同列曰大夫七十而致仕禮也吾敢久貪榮寵弗知止乎即移病謝歸葺第



真定闔門謝賓客娛意圖史以終其天年嘗作家訓以  
敕子孫導江張氏覽而喜之曰匪止家訓要以警世可  
也子孫服公之訓皆以學行聞於時公享年八十有七  
以至元三十一年十一月二十一日卒是歲十二月十  
五日合夫人尚氏之喪葬槁城縣安仁鄉南董村先塋  
董氏葬是二百餘年矣子男二人曰儀終行省郎中曰  
居中終靈壽縣尹二女長適郭秉德次適柘縣尹張行  
中孫男三人堅均基曾孫男三人興宗啟宗承宗公既

葬之三十九年當至順壬申基撰公行事徵銘神道之  
碑基之言曰昔者先公被遇世祖列官三品德業著聞  
基也幼孤而弗克知幸其一二可考知者誠懼歲久又  
泯泯也然而古之君子其言行豈能盡傳於世惟其大  
節不誣則固史氏所宜書也夫銘誌之作義近於史蓋  
銘其所可知則其未盡知者可推而知矣天爵受其言  
退而述之以銘銘曰

於赫世皇百治具張小大有位無材不良偉歟董公樂

謂多譽相時而興雍容中度疇須奇畫我其資之疇畫  
善政我其施之帝瞻南邦未洽聲教尚資老成克撫無  
撓自昔有國黃髮是詢有典有則永綏兆民曾無百年  
故老漸盡公有慈孫嗣守遺訓考公大節廩廩不誣爰  
徵銘詩式表幽墟

祕書少監王公墓誌銘

中統建元之明年世祖起中山王公為贊善大夫輔皇  
太子親授之書是為裕王其書冊之端有親書廟諱厥


後書歸王氏延祐三年仁宗御光天殿贊善之子祕書少監賓執其書以獻上穆然曰是皇祖所讀之書歟朕何敢不敬有詔褒寵王氏曾祖順贈中奉大夫太常少卿中山郡公諡安定祖良贈昭文館大學士資善大夫中山郡公諡端愨父嘉議大夫太史令恂贈推誠守正功臣光祿大夫大司徒上柱國定國公諡文肅曾祖妣趙氏祖妣劉氏俱追封中山郡夫人妣張氏追封定國夫人繼姚氏封定國夫人又命中書遷賓官未及命而

賓卒延祐七年夏六月某日也當是時天子方鄉文學  
賓重以是起之贈典罷已久祖考蒙是休澤可謂忠於  
上而孝於親者矣公字子立賓其諱也贊善之幼子性  
資開敏初從祭酒許文正公游小學四書悉能通其大  
旨贊善兼以星官厯法妙一世既為太史改正厯日公  
亦傳其學贊善薨選為太史院保章副累遷至少監焉  
公少長富貴未嘗有富貴氣容儀雅潔若寒士然居京  
師未嘗謁貴人門嘗語其子弟曰吾名臣後也當慎守

先業豈可妄與新進小生交游哉至大中尚書省因某  
挾異書遂起羅織之獄公視家所藏凡涉天文陰陽家  
者悉焚之謹厚類此娶郭氏太史院使守敬之孫都水  
少監某之女二子楨主滄州清池簿桂補太史星厯生  
公享年五十有二權殯都城東南十里楨將以至治三  
年六月某日葬公安喜縣北扈原銘曰

於皇仁宗文治太平一時才藝咸列禁庭矧茲遺經裕  
皇宸翰藏之臣家榮光有爛恭進丹陛允也其時斯文

日興亦公啟之愍冊祿章褒及祖考將進大官胡命不  
偶北扈之原土厚泉深銘昭厥美以視來今



滋溪文稿卷十

欽定四庫全書

集部

滋溪文稿卷十一

詳校官庶吉士

臣陳若霖

中書

臣

劉源溥覆勘

總校官進士

臣楊懋珩

校對官中書

臣

范鏊

騰錄監生

臣

劉璫



欽定四庫全書

滋溪文稿卷十一

元 蘓天爵 撰

碑誌

元故贈推誠効節秉義佐理功臣光祿大夫河南  
行省平章政事追封魏國公謚文貞高公神道  
碑銘 有序

仁宗皇帝延祐初元召江浙行省左丞高公復拜中書

叅知政事公以母老乞歸養上不許留為集賢學士尚  
議中書省事是歲十月母夫人卒公護喪歸葬明年用  
起復故事擢江南諸道行御史侍臺御史又拜樞密副  
皆不起上簡注公不忘又明年冬遣使趣召仍命之曰  
汝以大祥日至則能為朕來矣使者果以其日至公惶  
懼不敢辭既至入見便殿聖眷優渥即日命侍臣送至  
中書叅知政事四年進階資政大夫遷左丞五年陞資  
德大夫遷右丞公自早歲已在朝省練國故實凡選舉

錢穀決獄悉其原委事物之至應之間暇尤善用一時人材能布列中外或承時好黨同惡異公曰任人各以其材不可妄有分別也當是時仁宗皇帝事皇太后孝養順承惟恐不至而英宗皇帝方育德於儲宮公與一二大臣同寅協恭承弼輔贊俾三宮怡愉九有清晏年穀豐衍民庶樂康是則公之相業最著者也然小人不便陰偵潛伺思有以害之矣七年春仁皇不豫特們德爾已在儲宮左右譖言倉廩空虚傳旨命具錢穀大數

以聞公曰某等備位宰府轉政興化用賢理民乃其職也至於錢穀自有主者彼聞之益怒居無何仁皇賓天英廟未立特們德爾遂為丞相擅政肆虐盜弄威福睚眦之怨無不報者以已曩者得罪憲臺公坐視弗救心尤恨之乃以公及平章王公毅參議韓公若愚徵理錢穀又屢揚言上前以為世祖之時幣朽於庫桑格嘗奏誅其執政二人蓋欲以此譖殺公等賴英廟察其無罪第罷其所居官放歸田里公始以同知中政院事特拜

中奉大夫中書參知政事明年至大紀元冬十月武宗  
皇帝親祀太廟公充讀祝冊官禮成錫與甚渥二年尚  
書省立議更鈔法公言鈔今已虛數倍若復抑之則鈔  
愈輕而物愈貴非法之善也時不能用其言出公為江  
浙行省參知政事有旨範京城新寺供佛銅器以行省  
督視之期已迫銅不能具或欲銷省庫錢以充用者公  
曰歷代泉貨孰敢擅毀有頃詔發庫錢與楮幣兼行衆  
方服公之識海舶歲運米數百萬石以食京師官為給

其道里費然歲久法弊及民者十蓋一二至是朝廷命公領之分毫悉給於民公以海漕官吏出入風濤百死一生勞効殊甚請優其序遷以勸來者廷議是之遂著於令進拜資善大夫本省左丞會平章張閭請括江南民田以益賦稅公言國家承平日久賦稅皆有常經民心一搖恐生他變已而迄如公言泰定之初詔以特們德爾專權蒙蔽報復私讐杜塞言路構害忠良等罪播告天下而公等始獲昭雪矣超拜榮祿大夫湖廣行省

平章政事佩金虎符節制諸軍時兩江岑黃數為邊梗  
公請於朝曰蠻夷之人僻居遐荒撫則治擾則亂自昔  
然也竊聞岑黃初則未敢猖獗蓋緣招諭官吏恣意貪  
求或不如欲輒復以威脅之遠人由是不敢効順前廣  
西僉憲鄂屯呼圖克向嘗按臨其地威惠並著若命為  
本道帥使則岑黃可不招諭而至矣詔從其請岑黃聞  
之踴躍語人曰吾豈惡生樂死者耶今鄂屯侯來吾無  
患矣乃相帥請附他夷小醜亦皆化向焉事聞詔賜公

玉帶弓矢鞍勒以旌其功歲餘改江浙行省平章政事  
江左繁富中外徵求百至公熟知其利病又得托歡達  
爾罕為相同心輔治專務簡靜不擾以是民用寧一致  
和改元春海潮日溢齧鹽官州其域將陷浙民大恐勅  
使者數輩行視衆議累石為岸以捍海公曰政事弗修  
則變易數見今海水為災殆陰盛陽微之咎第君臣修  
德恤民庶幾可彌若復勞民愈為不可夫海患不息浙  
西已弊又為石岸則害及浙東且石岸延袤百里功非



十年不就而海患近在旦暮比岸成兩浙之民俱為魚  
鼈矣衆是公言未幾海患亦漸息則公之謀國保民世  
所共聞者其陰為彌縫補益人受其惠而世不及知者  
則亦不得而書也公諱昉字顯卿世為遼東右族國初  
始遷大名少美風儀人觀高朗涉獵書史考求前代治  
忽君臣得失與夫應時合變先後本末之序期於有以  
發為論議措諸事業以表見於當世焉甫冠游京師名  
聲藉甚會立集賢院以學行辟為掾國有大政集諸老

議之公屢侍行而聞見益博擢都省掾故相何公榮祖器其材以公輔期之調吏部主事建言仕者厯履歲月治行廉貪無由核實吏得並緣為姦宜書於冊置局司之每遇轉官考驗以為黜陟廟堂從其言迄今行之遷左司都事又遷員外郎承檄調廣海官人稱其公還為禮部郎中奉詔慮囚燕南活冤獄若干人改吏部郎中時入官多途選授無法公請除文墨士為長吏雜進者貳之由是選法清而衆職舉遷禮部侍郎浙西豪民即

所居為佛廬舉家度為僧尼號其教曰白雲宗日誘惡肆為不法奪民田宅奴人子女郡縣不勝其擾中書以聞公承命按治凡得民田廬若干所還為民者若干人賄賂沒官者若干萬浙民大快時順德忠獻王當國選公為左司郎中贊畫政務居多嘗以言忤權貴出為潭州路總管潭為湖南大郡訟牒填委公決治明允頃之訟亦衰止郡吏求補者衆公日以所決事試其可用者得數十人部民有詐稱勅制者逮繫數百公詳讞之止

坐二人餘皆釋不問貴官侍從恃勢擾民公痛絕以法部內清整憲司以治最聞潭人方樂公政而公召為中政矣公養母甚篤居喪如禮者孝行聞於郡國為人清簡寡欲齋居宴坐終日默然及臨大事敷陳宏辨咸中肯綮宇量宏深嘗曰人能容斯足以任天下之責能忍斯可以成天下之務又當以靜為主焉故以主靜名齋蓋平太極圖訓云天厯元年九月公偕行省臣五人赴召入朝十月十有九日行至陵州公以疾薨春秋六十

有五明年二月十有五  
日葬大名元城縣令公卿先兆  
曾祖考植金洺州防禦使皇贈通奉大夫遼陽行中書  
省叅知政事護軍魏郡公妣大氏魏郡夫人祖考世榮  
金近侍局副使皇贈資德大夫河南行中書省右丞上  
護軍魏郡公妣王氏魏郡夫人考昂仕國朝為濮州朝  
城尉累贈榮祿大夫江浙行中書省平章政事柱國魏  
國公妣郭氏孫氏俱魏國夫人公配富察氏清豐監縣  
某之女早卒麻氏太醫院官判贈大司徒恒國文惠公

澤之女亦先公卒俱追封魏國夫人繼白氏子男三人  
履補國子員歷官戶部司計工部司程監察御史江浙  
行省左右司郎中恒以公廕為太府監右藏庫使河間  
路總管府治中皆以材能清慎聞麻夫人出次益側室  
王氏出也孫男二人女一人今上皇帝褒錄舊臣制贈  
公推誠効節秉義佐理功臣光祿大夫河南江北等處  
行中書省平章政事柱國追封魏國公謚文貞始終哀  
榮可謂備矣公昔按白雲宗獄先君以戶曹掾從行屢

蒙薦擢進長行省幕府遂以公為知己公薨諸子以神  
道銘見屬故天爵不敢以蕪陋辭蓋庶幾先君報德之  
萬一也銘曰

維高著姓世家渤海歷遼與金閱閱弗改桓桓太師有  
子十人列官節度冠蓋如雲慶流於公嗣德惟肖風度  
雍容訏謨廊廟肅肅長樂天子孝恭亦有春訪敬罔不  
同三宮雍雍百辟侃侃民樂治平匪邇伊遠曾是彊禦  
肆為詆欺惟天子明公歸祁祁公歸祁祁於魏之野徵

車既來星言宿駕徭人猖狂公務允懷海水齧城於時  
為災公言君臣當務修省民不可勞忠言炳炳維此江  
左地大物繁公治以簡民其孔安昔公早年令譽已著  
故老嘆咨期以公輔通權達變臺閣踐駁克有令子保  
公烈光公雖云亡德業愈偉何以徵之國有信史令公  
之鄉豐碑穹然勒此銘詩永表相賢

故少中大夫同僉樞密院事郭敬簡侯神道碑

銘 并序



至大二年夏六月癸酉少中大夫同僉樞密院事郭公  
薨於京師私第冬十月庚申歸葬中山無極縣歸化鄉  
龍泉里延祐六年公之子中書省照磨元珪始屬天爵  
狀公行請封謚於朝廷制贈大中大夫廣平路總管輕  
車都尉追封太原郡侯謚敬簡至正七年公之孫鏞乃  
克伐石樹碑神道復以銘文見屬於是上距公薨三十  
有九年蓋先子嘗侍公於樞府天爵與元珪故往來今  
鏞是請及見郭氏凡三世矣故弗庸辭昔者世祖皇帝

臨御天下封殖賢才興崇治功一時文武小大之臣歷  
乎成宗武宗之朝猶克有用於世若樞密敬簡郭公亦  
其人哉公諱明德字德新少長儀貌偉然力能兼人至  
元初天兵圍襄有詔募民為兵公出應募中選其父曰  
兒雖長大年未成童恐不堪用縣尹馮帖試以弓矢公  
蹶張挽強尹曰可矣樞密張公易聞其才勇留之樞密  
會立屯田總管府因署為史轉前衛史諸王納延叛東  
土帝親征之樞密大臣扈行公被選分掌募府文書間

亦執兵禦敵有勞獲賜鞍馬及還擢樞密院架閣庫管  
勾改斷事官知事前衛經歷遷樞密院都事同列坐事  
辭誣逮公人共寃之公曰吾寧忍自解以重人之罪乎  
未幾或告樞臣及其募官貪墨獨無公名臺臣疑之告  
者曰郭君實無所私臺臣始知公前時為衆所誣也大  
德初擢拜中書省檢校官遷工部員外郎五年京師大  
水瀘溝泛溢決牙梳堰壞民田若干頃廟堂檄公治之  
公命伐荆為巨困實石其中以殺水勢使復故道而堤

遂完自京城至涿道塗輿梁為雨水所壞者公相地所  
宜皆改為之或涉民田則厚價以買之故事集而民不  
擾六年海都犯邊邊民大驚宣慰司悉焚倉廩獨輦金  
帛南徙久之方定選官撫治公拜宣慰副使僉都元帥  
府事賜金虎符佩之時方隆冬冰雪載道或止公緩其  
行公曰某起寒族誤蒙拔擢至此敢稽天子之命乎明  
日遂行至則撫綏完復邊鄙肅然乃陳脩邊數事其說  
曰安邊之策務在屯田積穀且耕且戰自古如此今兵

屯北邊有年所須錢穀不少然歲歲而輸之運米一石其值中統鈔百餘貫貴則倍之使山北每歲有秋輸米者其家富完委輸官不敢為奸加以路無盜賊之虞僅可供一歲之用苟或不然利害非細今和林之北地宜麥禾昔時田器在在有之夫京師六衛每軍抽步士二人屯田以供兵士八人之食和林寒苦漢軍不能冬苦於蒙古諸軍揀其富庶強壯者戍邊貧弱者教之稼穡俟其有成如漢軍法以相資養置田官起倉廩嚴賞罰

以課其殿最或天有霜旱之災募民入粟塞下厚直酬之和林之錢或不償以江淮長蘆鹽引償之則數萬之粟可坐而致此外別立轉道買牛二萬頭車二萬輛用軍士四千人月給米三斗自大同達和林止四千里百里置一驛用軍士百人車五百輛配牛五百頭可運米二千五百石三日一返一月運二萬五千石十月二十五萬石何患軍儲之不足歟又曰武欲勝敵宜先練兵夫兵在精而不在衆往年敵人撓邊我師雖衆逗遛

而不能進且海都之衆不及國家百分之一甲兵之利  
非吾師之比返能為害何哉良由號令專一賞罰信明  
士卒練習故也古者遣將出師君親推轂而命之曰自  
閫以外將軍制之謂機宜不可以遠決號令不可以兩  
從蓋號令不專則人心不一機會失宜而欲克敵難矣  
邇者邊將欲賞有功必俟朝廷之命曠日持久訖無所  
聞此勇夫所以解體當中統初命宗王征李璫出金銀  
符數十有功者聽與矧今邊防非璫可比若舉舊典授

之將帥使賞罰信明則士卒百倍其勇而於克敵何有  
又曰固邊安民必當高城深塹兵志曰城郭不完與無  
地同而况素無城郭欲積粟以禦敵是猶委肉於虎近  
年兵少失利固無固守之地逡巡退避千有餘里致使  
敵人侵我疆域劉我人民賴天之靈旋亦收復向若敵  
人深入不返則將柰何今當沿邊短度敵所來道或五  
十里或百里各修一城引和林河水灌墮俟秋熟則貯  
芻粟於中分軍屯守逮大藩於和林以總之如敵人來



攻一城諸城抽軍以救之則我內有脩禦之堅外有攻敵之急彼安敢輕動乎故曰無恃其不來恃吾有以待之無恃其不攻恃吾有所不可攻論者若曰勞民費財未見成功是不知邊防利害者也蓋和林國家肇基之地敵人之所必爭如襄陽宋之北門我得其門而入則宋不能有所為矣於是中書下其事會翰林集賢博議咸謂實脩邊經久之計歲餘公感寒疾辭歸中書省選為左司都事未幾參議樞密院事進擢本院判官公以

華人起身軍伍數歷年多凡累朝兵政原委當代將帥材能城郭山川之險邊戍屯守之要皆習知其故故在宥密稍久不遷他官又數條上軍政謂天下雖平不可弛武功兵雖不試不可不養其力海郡無事來朝不可不為之備內外兵勢不可有所偏江南軍馬不可分散而無統及論軍士貧乏之原皆深悉其弊廷議是其言進拜同僉樞密院事至大之初詔汰冗員公請辭不允蓋上撫軍北庭嘗聞公名至是賜金帶錦衣以表其勞

薨年五十有二公早遊鄉校涉獵書史自為下僚所居  
職辨樞密簿書歲久繁猥公序其始末俾易檢覆吏不  
能為奸當國初用兵有近臣承詔賜民十家為兵前驅  
既久怙勢沒為奴婢而十家子孫陳訴不已樞臣檄斷  
事官讞之公閱故牘得初賜詔其事始白十家老幼凡  
數千指皆良之公考府君諱聚金季自汴之陽武家無  
極嘗施粟以賑鄉里累贈中順大夫中山知府上騎都  
尉太原郡伯妣程氏封太原郡君配張氏無極縣尹成

之女張尹初竒公才以女歸焉累封太原郡太夫人子  
男元珪歷知陵州開州同知河東轉運司事遷廣平路  
總管卒官嘉議大夫真定路總管所至以廉慎聞元璋  
善學早卒女適中山劉雲翼大都高章章卒官奉訓大  
夫濟南路推官男孫鏞補國子生女孫適王蠻爾李榮  
蠻爾為岳州鎮守百戶銘曰

世皇御極覆幬如天封殖長養蔚多才賢廊廟之謀軍  
旅之事出入左右咸克有濟偉哉郭公起身兵戎言無

不達才無不通於皇天朝神武有倬王迹肇基實本龍  
朔慨彼昏迷弄兵於疆皇威赫然震虺暴強公承明命  
往撫邊鄙邊人既寧乃陳兵事自昔國家選將練兵屯  
田積粟以永厥成君子之心憂深慮遠言論設施欲固  
其本時方治平文恬武嬉文武並用長久之規嗟嗟鄙  
夫尸祿拱默惟身是圖其何能國樂只君子邦家之基  
王事所賴民生攸依尚思公言慷慨奮烈欲為朝廷永  
樹長畫龍泉之原巋然公墳勒銘豐碑以勵臣具

元故嘉議大夫工部尚書李公墓誌銘

并序

維廣平雞澤李氏前至元初徙家於潁公諱守中字正卿少就外傳涉獵書史奮然自樹當是時入官者多由吏進公年出二十來游京師補左司令史轉戶部通政留司掾進掾中書公志大而氣剛不隨俗依違俯仰事或不然輒指陳可否直言無諱守身廉白人不敢干以私初朱清張瑄漕江南米涉海入京師至則遍賂諸用事人公時主治文書獨無所取大德三年北兵犯和林

公從大臣往給金帛邊人賴其惠徽政臣奏除官千五百員將頒勅公曰是有官第七品超遷三品者有武人雜選入清流者有治罪奪官復冒用者殊乖選舉典宰相是其說命徽政覆奏止之至大二年尚書省立公上言曰昔在世廟宵旰求治分置尚書省以清中書之務明詔具在今尚書省臣攘奪政柄變亂憲章用人無事法漸大壞返謂中書墮廢法制當辨中書所廢者何尚書所治者何事聞權貴大怒以公間謀兩省輔臣

廢黜田里既而尚書省臣敗誅公起家承直郎保定滿城縣尹縣以大治燕南憲司以五事聞延祐二年河東大雨解鹽池壞選官治之六年復命公視其池堰督其課最宰臣語公曰昔宋耀州觀察使王仲千著績鹽池汝能效焉亦仲千也公益感激巡行陝西歸言於廷請革巡鹽吏胥設官分司其他防鹽之方擾民之事可悉興除廷議從之又承命往治河間鹽法請罷煎餘鹽五萬引以蘇民力別陳十事上之遷奉議大夫戶部主事



以親老乞便養改知泗州州獄繫囚百餘公下車數月  
皆決遣之民有誣寡婦為同籍欲奪其產者有訟田殺  
人誣其田主者有覲免已罪以賂誣其吏吏者公悉辨  
明之抵誣者罪准東憲司薦其廉能擢河南行省左右  
司員外郎丁外艱服除調兩浙轉運鹽司副使公言法  
久則弊理宜變通今兩浙竈民凋弊日甚當驗其恒產  
差為上下竈民既為國輸課不當復役里正代償民租  
不然將見竈民愈困多徒死矣公在官五年身歷兩浙

郡邑熟知其弊工本親給與民官屬不敢有所掊克故事集而課亦溢比終更增鹽五萬餘引浙省言宜陞公官遂加中議大夫歸德知府兼諸軍興魯勸農事知河防事公聽訟益明訟亦衰止歲餘請致仕以嘉議大夫工部尚書歸老於家公為人磊落明白在官思盡其職嘗以通制書歸類未盡別著條目以進其後朝廷續纂其書亦取用焉所至訓農興學崇化善俗滿城泗州歸德皆修三皇及孔子廟而廳舍河防鐘鼓更漏驛傳皆

繕完之歸德又新微子張巡許遠祠木石所須皆公規畫不擾於民世以是稱其材嗚呼我國家初由胥吏取人人才亦多由是而顯故叅知政事曹公從革刑部尚書謝公讓與公同居里閭材能相埒二公別厯中朝赫然進用公獨以剛直自持老於郡縣人或不能無少憾焉然公臨民而民治理財而財豐所去見思刻石以頌遺愛諸子皆以文學進知名於一時天之報施公者詎弗厚歟公曾祖俊妣某氏祖成由潁川判官權知州事

贈亞中大夫廣平路總管輕車都尉隴西郡侯妣吳氏  
隴西郡夫人考榮贈嘉議大夫僉書樞密院事上輕車  
都尉隴西郡侯妣高氏隴西郡夫人繼魏氏隴西郡夫  
人公配張氏隴西郡夫人子男五人冕某官藻國子釋  
褐出身文林郎祕書監典簿黼賜進士及第奉政大夫  
江西行省左右司郎中繡賜同進士出身將仕郎翰林  
國史院編修官德安最幼繼室溫氏出也女二人適儒  
士真定曲明善及天平程梓男孫五人秉易從仕郎吳

江州判官秉簡秉方國子員秉凡秉恒俱幼曾孫男女  
各一公享年七十有三至正二年五月壬午以疾薨是  
歲某月某甲子葬賴之某鄉某原銘曰

維天生材材匪有殊作之興之相時以趨為吏為儒蓋  
本時用是以君子慎於垂統皇有中國神武肇基豪傑  
繼起法令為師偉哉李公氣剛以直理財治民克致其  
力或言法家嚴而寡恩公歸維厚蕃蕃子孫蕃蕃子孫  
振起術業著銘幽宮永詔來葉

皇元贈集賢直學士趙惠肅侯神道碑銘

至順三年春二月大雨雪翰林直學士趙公上言曰立  
天之道曰陰與陽立地之道曰柔與剛立人之道曰仁  
與義夫仁義之政不修欲陰陽敘而天以清生物遂而  
地以寧未之有也某自中元中入官五十年矣日月薄  
食星文示變五行反戾皆未之學春夏雷雨秋冬霜雪  
雖五尺童子知其反時必能為災按授時厯雨水正月  
中氣春分二月中氣也四陽上行卦為大壯今自正月

雨雪至二月未已京師二月未嘗無雪連綿二十餘日  
雖在隆冬猶以為異况仲春乎陽和弗與陰凝弗失蓋  
陽為君為善為君子陰為臣為惡為小人可不豫防其  
變乎中書以其言下禮部議識者知公之意益深遠矣  
夫翰林集賢祖宗所以優異儒臣乞言議政而已比者  
耆舊老死且盡君子傷之公自入翰林恒以時事為念  
數數陳便宜謂近歲以來紀綱漸弛刑政漸紊財用無  
節選舉無法人材日壞風俗日偷聖上中興當作新庶

政否則海內失望不可為矣每遇臺省大臣必反覆言之聽者厭聞而公弗恤也公初試殿中司知班既而以伯父守贛廕入官歷河間之鹽山蔚州之靈仙滄州之無棣三縣主簿遷忻州秀容縣尹轉椎州新城至治元年詔舉守令燕南部使者以公應詔改尹中山安喜由臺臣薦拜陝西行臺監察御史僉四川道廉訪司事天歷元年召拜監察御史特除山東道廉訪副使改燕南道遷同知儲政院事拜燕南廉訪使以年老乞致仕不



允遂拜翰林直學士公稟剛毅卓然能自樹立雖生世家周知閭閻利病筮仕佐治已有能名秀容俗頗譁評訟者在庭公丁寧指曉曲直杖楚遣之不以付吏既而訟亦衰止有民家女為妖物所憑或能以術治者即投瓦石擊之公聞之曰約某日弗靖我往觀之妖不復作其家繪公像祠之新城密邇畿甸太保圉人縱畜牧蹊田嚙桑即收繫獄反誣公詆訾太保太保怒命其長史持刑部文符案治卒無所得長史直公而兩釋其事太

保則曲出也駐蹕莊者丞相拜珠賜田封戶在馬公始  
置社什伍其民丞相方在中書聞而嘉之曰縣令當如  
是也安喜當西南要衝侯王大臣遐方使者經過絡繹  
前政苟簡凡館傳所需供帳器皿取辦臨時吏並緣為  
奸民不勝擾公具為區處道路河梁亦修治有方朝廷  
和買於民而直不時給歲終又以衛士馬分飼民間公  
以縣劇民因為言並得蠲免有游民百輩廁名縣卒會  
斂於民公悉遣歸南畝縣政既修公行原野勸民植桑

墾田以勸農業大興鄉校延師儒教其邑民俊秀者俾  
知禮義之方久之政譽播聞流戶來歸者百餘家公緩  
其力役而優養之工部尚書教化者由嘗監縣家焉乘  
歲惡民急數稱貸以與民獲利不貲或不能償輒奪人  
田廬奴人子女豪強武斷以亂吏治民甚苦之公發其  
奸遂得罪田廬子女悉還與民公曰農之治穀猶去其  
莠治民而不去其惡善人何由自立乎新城安喜咸刻  
石以頌公政監察御史及部使者行過其縣民率老幼

數百人狀公行治爭言其賢遮御史使者馬不能行以故薦公尤力遂有西臺之命公語同列曰欲正憲剛當自己始侍御史哈斯布哈冒占民田立劾去及拜內臺益感激自勵首言天下既定不當有彼疆此界之分上都官吏宜盡錄用又薦翰林學士張養浩等五人材任宰輔初平章政事蘇蘇以上之立也已與有力恃功貪橫恣為不法會親祠太室蘇蘇充禮儀使稱疾不起上在齋宮輒褻服入見公劾其不敬知樞密院事額森額森爾

將兵出禦西軍聞河南告急逗撓不行方殺戮無辜私人婦女西軍既退有勅入朝又不奉命公劾其不忠二人皆以罪廢其在山東燕南巡行郡邑風采凜然貪吏聞之或自引退公仕州縣凡四十年及任憲臺年已老矣方公少時得展布所蘊其設施豈止是耶自昔國家置立公卿大夫郡牧邑令所以內外相維共成治效非有遠近親疏之別也或者往往重內官而輕外職使循良之吏老於郡縣而不得達若公者幾何其不至是哉

公諱晟字子昌奉聖州磬山人後徙易州涑水曾大父  
世英仕金為易縣令大父柔國初倡鄉民來歸官金紫  
光祿大夫真定涿易等路兵馬都元帥追封天水郡公  
謚莊靖考守信廣宗縣尹贈資德大夫中書右丞上護  
軍天水郡公謚康惠母李氏追封天水郡夫人公享年  
七十有四以至順三年五月戊寅薨於京師是月甲申  
歸葬其鄉五峰山先塋之兆夫人宋氏祔子男四人道  
安從仕郎右藏庫副使禮安承事郎同知清州事居安

從仕郎宣政院照磨志安太保府知印孫四男人文景  
亶襄公孝友天性為主簿時母夫人尚無恙嘗有所怒  
拄杖候門公自外歸扶持還室因跪曰某誠可撻家人  
竊視殊無難色兄弟亡事寡嫂甚謹撫其孤如已子公  
平時食止蔬素年出五十方佐以肉被服布帛而無紕  
綺子孫化之亦以清約世其家公葬之明年制贈亞中  
大夫集賢直學士輕車都尉追封天水郡侯謚惠肅夫  
人宋氏贈天水郡夫人銘曰

遠矣趙氏世宅北土顯聞中朝肇自公祖赫赫元帥活  
人有功慶流後裔益亢其宗公昔少時學于古訓剛毅  
自持匪今之徇厯官劇縣有法有恩誅鋤奸強牧養善  
民養民伊何政平訟理樂爾室家安其田里擢拜御史  
正色敢言彈射柄臣他人所難河山東西分持憲節貪  
墨敗官聞風震聳縣車之請惟帝是留公圖報稱益  
壯其猷時在仲春雨雪如霰陽和弗與宜謹天變顧瞻  
左右豈無臣工優游清華進退唯恭獨公之心憂世如



疾鯁論並議為國藥石遐不黃耆考終厥身追誦公休  
尚師古人遺愛在民遺直在史勒銘貞珉永詒千祀

滋溪文稿卷十一